

M. h. 1924

Purgation, Practica

PK

Cometen:

1576-88.

1) — 15)

6

**Kurtze vnd Einfaltige**  
**betrachting / des jzo erschienenen Co-**  
**meten / welcher gesehen ist worden im Jar**  
**77. den 11. Nouembris.**

Zu ehren vnd wolgefallen meines lieben Vaterlan-  
des / in sondern desselben vier Erbaren Steten  
Göttingen / Hannouer / Hameln  
vnd Northeim.

M. W. 192

Zusammen gezogen durch **Hectorum Mithobium**  
**medicinae Doctorem.**

Bo : Arneken.

*Amula diuinæ vocis coma dira Cometæ est*  
*Vtraq; mortales namq; futura docent.*  
*Et velut ante omnis sic non minus ille Cometa*  
*Tristia multa tulit, tristia multa feret.*  
*Sed cum voce Dei motos meliora sequuntur.*  
*Sic quos signa mouent, fata secunda manent.*

Gedruckt zu Magdeburg / durch **Wolfgang**  
**Kirchner / anno 1578.**

*Argumentum tractatus de Cometa.*

**D**urch seine flammen der Comet/  
Vorkündigt gar viel hertzeleidt/  
Krieg Pestilenz vnd thevörung schwer/  
Dar mit die Welt strafft Gott der **HERR**/  
Auffrühr sich wird erregen bald/  
Beim gemeinen Man/gar mannichfalt  
Zu dem wird schier auff dieser Erden/  
Was guts ist nicht gehört werden/  
Das land/ der Hausman bauet wol/  
Aber wenig er in armen soll/  
Auch der Cometa zeigt an/  
Viel vnglücks bey gar mannichen man/  
Fürsten vnd Herren mit grosser noth/  
Werden gar plötzlich bleiben todt/  
Vnd wird in summa nichts auff erden/  
Des vnglücks gar gefreyet werden/  
Welchs dieser stern thut zeigen an/  
Das wird erfarn der gemeine man/  
Der fromme Gott der vns durch sein gnad/  
Sein liben Son geschencket hat/  
Der wolle durch sein gütthe vnd gabe/  
Solch vnglück wenden abe/  
Das wir jm dancken alle zeit/  
Vnd rhümen sein barmhertzigkeit/  
Amen du trewer Gott vnd **HERR**  
Vorlas dein Kirche nimmer mer.

M. G. H. F.

*Ioannes Damascenus dicit: Cometam a Deo fieri & a Deo dissolui. Fieri autem ad signandum mortes, regum & mutationes imperiorum.*



**D**Rsame Vorsichtige vnd hochgelarte  
Wolweise günstige Herrn / Als ich von vie-  
len meinen guten Freunden mündlich auch  
Schriftlich bericht von dem erschienen ze-  
chen zu thunde ersocht vnd gebeten / so haben  
irer viel doch gezweiffelt / was dis schreckliche  
Himmelzeichen sey. Ob es etwo der gemeis-  
nen allzeit stehenden Sternen einer / daran sich etwo disse  
Flamma gesetzt / oder ob es ein ander zeichen sey / haben auch  
wissen wollen / wo von dis zeichen erwachse vnd erspriesse /  
was namen es habe / vnd wie es könne vnd müsse genennet  
werden / Auch was es jtz vnd hernacher bedeuten solle vnd  
könne.

Ob ich nu woll deren vielen mündliche antwort also  
bald gethan / wie es darumb geschaffen / so bin ich doch von  
vielen meren gebeten / diese meine meditationes in den druck  
gehn zu lassen / darmit nun ein jeder Christlibender dem den-  
noch solche dinge mehr als den rohen wilden Cumpanen zu  
hertzen gehen / gründlichen bericht haben müge / habe ich dies-  
sen kurzen tractat vnter **E. E. W.** gunst vnd namen zu vnters-  
richt dem gemeinen Leyen ausgehen vnd drucken lassen / vnd  
wil darinnen vormelden vnd anzeigen / wie das es zugehe das  
er zu weilen klein / auch zu weilen grösser gesehen sey worden /  
was inen auch vberwards / da er von ersten nidderich gestan-  
den / vnd in die hohe treibe / da er nicht weit vber dem Horis-  
zonte anfenglich erschienen / darnach sein höhe / sein grösse /  
warumb er auch nicht stets an einer steth bleibendt vorharre  
vnd gefunden werde / auch was er sey / was er bedente / nach  
anweisung meiner Bücher in gemein anzeigen / dis sampt  
lich vnter ewerm schutz vnd schirm nach gelegenheit eror-  
tern / so viel mir des gebüren wil **E. E. W.** dienstlich biddent /  
dieselben wollen diesen meinen einfaltigen tractat vor lieb  
auff vnd annemen mich auch von den allgemeinen Zoilis be-  
schützen helffen.

Da ich aber den hochuorstendigen in dieser kunst / wels-  
che zu diesen observationibus müssiger / auch aller hand mehr  
instru

instrumenta/ vor sich haben/ daraus sie dis / nach Kunst vnd  
gunst der instrumenten / gnawer vnd gewisser schepffen könn  
nen/ nicht gnug thun würde/ so ist das meine mehr theils dar  
umb geschehen / solche hirdurch zu locken / darmit sie weit  
laufftiger als hir nicht geschehen ist / darvon schreiben mög  
gen. Der trewe Barmhertzige Gott eröffne auch vnser herz  
ge/ das wir die gemeinte straff / durch das gebethe vnd ware  
buß von vns abwenden mögen.

Auff die erste frage darinnen zu wissen begeret ist/ obs  
ein Stern/ vnd ob mans zuuor aus der Kunst wissen könne/  
darauff gebe ich günstigen Herren vnd freunde kützlich die  
sen bericht / Ob man wol gnugsam anweisung hat/ aus zu  
sammen fügung der Planeten / das sich Finsternisse / schreck  
liche wetter / auch wunderliche geschichte vnd gesichte im  
lufft vnd auff der Erden begeben vnd zu tragen werden / So  
kan man doch nicht aus gemeiner Kunst der Astronomi/ er  
klauben noch mit einiger arbeit erfinden/ an welcher stete/ auff  
welche stunde oder minuten/ in welchem ort/ der Himlischen  
zeichē/ ein solch wunder welchs in *infima elementari regione* gesche  
hen solle oder müsse entzündet werden/ den ob man wol weis/  
das solche zusammen fügung der Planeten etwas mechtiges  
wercken werden/ So werden dennoch diese zeichen / nach ge  
legenheit der materi / auch nach art des Himmels vnd der  
luffte/ formiret vnd zu solchem oder der gleichen miracel bes  
reitet/ vnd werden diese *Metheora* bey den gelarten in dreyerlei  
art gesetzet/ deren ein teil *ignea*, die andern *aquea*, die dritten *media*  
genennet werden/ Dis ist ein lufftig vnd fewrig *Metheoron*, vnd  
kein Stern/ von einem zehen fetten irrdischem vnd schwefel  
chem dampff / doch warmer vnd truckner natur / aus krafft  
vnd Wirkung der zusammen gefügten Planeten/ als *Marte*  
*Saturno* & *Luna*, lange zuuor / ehe er entbrandt/ in die lufft auff  
gezogen/ auch von dem geschwinden *motu primi mobilis* zu few  
ern geschickt gemacht / wenn nun disse materia also bereitet  
vnd sie der *sphaera ignea* neger gerucktet ist/ wird sie durch zu thun  
eins oder mehrer Planeten / angezündet vnd gefewert / vnd  
als wir sehen angesticket.

Ob

Ob es nun auff diese weise von den Astronomis vnd phyzicis also beschonet vnd dargethan kan werden/So ist es doch wie die vielfaltige vnd lange erfahrung gibt/ein fewrich auch eufferiges zeichen/des zorns Gottes/Regen vns vnd vnser vielfaltige begangene Sünde.

Es ist kein Stern/Sondern ein straff ruthe/denn Gott der hat einmal die Erden mit Kreuttern/Beumen/allerley gewechs/mit Menschen vnd allerley lebendigen Thieren/das Wasser mit gros vnd kleinen Fischen/Den Himmel aber mit vnzelichem zal der Sternen/vnd zweyer hellen schönen lichtern geschmücket vnd gezieret/vnd wird also der liebe Gott hinfüro keine newe Sterne mehr schaffen/da man nun solche fewrige seulen/fackeln/oder Cometen vnd deren gleichen (als offte geschicht) ansichtich wird/so gehören sie vnter die *Metheora*, vnd nicht vnter den zal der sternen/wie sie denn auch keine sternen sind.

Das aber dieser vnter seine mit brüder von erzlichen *Stella Comata Crinita* oder *barbata* genennet werden/geschicht aus den vrsachen/das dis entzündet fewrich liecht/wegen der höhe vnd weite/von vnserm gesichte gantzlich nicht/der größe nach/kan begriffen werden/drumb fasset das auge in sich so viel es kan/denn diese materia an sich selbest einer vnglaublichen größe/derwegen wircket das auge in sich/ime eine gleichförmige gestalt/als nemlich ein runde figur/der glantz des fewers schencket stralen von sich wegen *spirituum uisualium*, darumb ist es im gesichte einem Sternen nicht vngleich/da es doch kein sterne ist/dis kan ein jeder an sich selber zum besten vrsuchen/vnd befinden/so jemand ein liecht vor sich stelt/so kan er leichtlich seine größe vnd gestalt so gros als es ist/fassen/da aber der weg des gesehenen lichtes etwas abgelegten/so erscheinets kleiner vnter runder wegen seiner fernde vnd abgelegner weite/Weill nun diese materia viel meil weges gros/so scheint es doch klein/wegen der höhe welche sich in die 19000. vnd erzliche hundert meile wegges von vnserm gesicht vorstreckt/drumb kan sie auch so fullen komen nicht.

ni vnser gesichte genemelt werden / vnd erscheinet wie ein  
stern / da er doch kein natürlicher sterne ist. Aus diesem achte  
ich gnugsam dargethan vnd vorstanden sein / warumb dis  
vor keinen Planeten / oder andern stern zuachten / Sondern  
vor ein Meteoron / welchs ein schwebelische vnd erdische an-  
gezündte fettigkeit ist / nach gelegenheit aus schickung Got-  
tes durch die Constellationes der Planeten zusammen gezogen/  
vnd auffgerücket bis vnter den Himmel des Mandes da es  
enzündet vnd angesticket ist worden.

Dieweil auch diese materia erdisch vnd vorgenglich/  
so wird das selbe nach gelegenheit vnd vielheit der materien  
letzlich vorbrennet vnd vorzeret / welche doch an des Firma-  
mentes kleinstem sternem keinen gespüret wird / vnd in keine  
wege geschicht.

Dieses fewrigen zeichens namen ist bey den alten gree-  
cis ΚΟΜΗΤΗΣ bey den latinis gleicher gestalt Cometa / vnd dis  
von seinem Zoettechten barth oder schwanz / welches ge-  
meinlich an im gesehen wird / wird auch offte ein schoeff ster-  
ne genennet / das er brennet als wenn an im ein schoeffstros  
brennete / oder wie er ein langer bessern oder zusammen ge-  
flochtene ruthe wer.

Es haben auch diese Cometen bey den alten scribenten  
als Ptolomeo, Aristotele, Plinio, Leopoldo vnd anderen / mannigerley  
beschreibung arth vnd namen / werden doch gemeiniglich  
nach irer gestalt form vnd farben getaufft vnd genennet.  
Leopoldus Austriacus setzet sie in neuerley gestalt / der wegen  
auch einem jeden planeten den seinen zu eigenet / dem sie von  
farben annutig sint / Plinius lib. 2. Naturalis historie beschreibet irer  
zwelff / mit vnderscheidenen namen / Velcurio in seiner physica /  
zeucht sie alle vnter drey namen / diese drey sint auch am ge-  
meinsten / vnd können die andern alle vnter diese gezogen  
werden / der ein ist löcherich fuller stralen rings vmbher / des  
ren einen haben wir vor fünff jaren in den himlischen ge-  
stirnde

Kindte der Casiopee schül gehabt/ welcher fast in die ander  
halb jar gestanden vnd von mir obseruirt ist worden / was  
auff dieses erscheinung geuolget/ haben viel trewhertziger vor  
hero gesehen/ vñ prognosticiret/ Irer viel mehr aber / habens  
mit zuthun der finsternis im schützen mit ganz bekümmert  
ten hertzen befunden/ vnd gar schmerzlich gefület/ die andern  
sind beyde mit einem bart oder schwantz gezieret.

Des Plinij vnd Austriaci austheilung hir an zu zihen  
achte ich von vnnöten / denn daraus dieser zeit wenig zu fass  
sen/ gebüret sich in schulen weitleunfftiger zu erzelen / vñd zu  
erkleren/ Austriacus setzet den ersten vnd nennet den *nigrum*  
& *obscurum* den gibt er dem *Saturno* in den zal höret dieser / denn  
er ist *trubedine deformi horribilis* gnugsam gewesen.

Dieser Cometa ist in vnserm Hemispherio anfenglich gesehen  
vmb 6. vñ des abends vff den elfften Nouembris/ vñ ist meines  
behalten zu der zeit *Saturnus* der planet im 6. grad des Steintz  
bocks gestanden / dennoch kumpt mir auch glaubwürdig vor/  
das er mehr als acht tage zu voren in Franckreich vnd Lotta  
ringen solle gesehen sein worden / Achte solches darfür das er  
wegen vieles vngewitters vns vorborgen gewesen sey/ vnd  
dieweile sie mehr als wir nach Sünden wohnen inen besser in  
dem gesicht gewesen / hette vns auch one des zu abendt der  
Sunen zu nahe gestanden. Als er aber aus den *radijs Solis* vort  
gerücktet/ da ist er aller ersten auff den 11. nouembris vns er  
schienen.

Solte er nun gleich zu voren laut Leonhard Thurn  
heusers in seinem Calendario beschehener anweissung vier  
wochen vnd mehr tage angezündet sein worden / so stehe ich  
doch in zweiffel/ ob man die *metheora* so gewisse abrechnen  
konne/ stels aber an seinem ort/ da es hin höret/ wer in also ge  
wesen/ so würde er vnter vnserm horizonte vielleicht im himlis  
schē zeichen vñ dē Schützen entzündet sein worden / so hetten  
wir in on des weñes schō gut wetter gewese doch nicht sehen  
können/

**Können/Ob nun Ichs sey oder nicht darumb wil ich mit niemant fechten/noch vorgebliche wort wechseln/sondern viel mehr inhalten.**

Als ich in aber / auch viel ander guter leute dieser orten gesehen/ist er im dodecatemorio Capricorni nicht weit von dem Adel bey dē obscuris stellis Antinei (wie auch vorgesagt ist) erscheinē auch nicht vber anderhalb stüd vber dē horizonte dieses ortes gesehen worden / Wiewol er aber den abend fleunigen vnd bald ist vntergangen/so hat man dennoch des andern tages spüren können / das er geswinde vom abend nach dem morgen gerucket ist / darnach ist es mit vns widerumb Wolkig regen wetter ingefallen/darunter er sich vorstecket vnd nicht bald widerumb gesehen worden.

Das aber dieser Cometa so trübe / so roth / so gros vnd schrecklich erschienen ist/das gibt die vielheit seiner materi/ es wirckets auch die art seines Vatern des Planeten / hirtzu hilffet auch die dicke zehe fettigkeit der materi/so hilfft auch nicht wenig hirtzu das er zur selben zeit dem erdreich ganz nahe gestanden vnd wir inen in vnserm gesicht durch die dämpffe vnd nebel der erden eingenomen haben / also scheinēt auch die Sonne des abends vnd morgens roth vnd gros wenn die nebel vnd dämpffe zwischen die Sonne vnd vnser gesichte tretten / gleichsals geschicht so man etwas in dickem wasser oder glas sihet/ so scheinets stets grösser als es an im selber ist/ Er ist aber one dis noch sehr gros vnd schrecklich hernacher auch gesehen worden.

Das er aber auch darnach offte klein bald grösser erschienen ist/hat diese vrsach/ das wie er ersten vns erschienen / der newe Mon mit seinem glantz dem Cometen seinen schein nicht benemen kondte/ als in aber das volle liecht oder mon zu nahe getretten/welcher viel mall grösser auch vngleich höher stehet/ hat der mon im seinen glantz vnd schein fast viel benomen/denn die metheora schweben vnter dem Circel des mons in regione elementalī.

Dieses

Dieses Öbero zu erkennen vnd war zu machen gibt die tageliche erfahrung/da man in einem gemach ein starckes lichte oder facteln anzündet / so wird dem geringern licht sein vol- lenkomener schein benommen / wie denn im gleichs fals des tages licht seinen ganzen schein vns vorrücket hat/da er doch alle tage vber vns hero gezogen/Wenn im aber nun der maln widerumb entgangen vnd fern entwichen / so ist er auch wie derumb in anschen grösser wie zuuor / da er nahe bey vnd vnter dem schein des monats gestanden/ erschienen.

Es ist aber nichts desto weniger seine materia/welch ein vorweslich dinc ist von tage zu tage mehr vnd mehr vor- brennet vnd vorzeret worden / also das er auch jtz ganz ges- ringscherzig weder er anfenglich ist gesehen worden / wir has- ben aber im ersten anfang seine vorzehrung wie viel die ges- wogen one zuthun der instrument nicht spüren mögen/er hat auch nicht seinen starcken lauff im welchem er erstlich gefun- den/vollen füret/ Sondern er ist mehr nach der seit nach nor- den hinnan gerückt/nach dem kleinen röslein vnd delphino/ vnd die flammen seines schwanzes/ da sie von erst nach süds- ost /vmb das fest Andree einer Türckischen langen strausfer- dern gleich/herumher ins osten nach nordem gesetzt / ist also in dieser geringer zeit weil er gestanden / nicht allein einen gar schnellen weiten weg in seinem eigenem lauff in longam/ son- dern auch in latum gelauffen welchs sich vff ij. ganze grad/vñ 20. minuten kan gerechnet werden. Das er aber alle tage ein- sten herumher gerückt worden / solchs geschicht aus dem schwinden lauff *primi mobilis*.

So lange wir inen haben sehen können/ so hat er durch strichē / des himlischen zeichen des Steinbock's/wassermans/ vnd etwas der visch. Ich kan aber nicht gleubē das er hinfür- ter mehr zeichen erreichen / vnd durchstreuffen werde / denn er ist allberet ein zeitlang vor dem Pegase/das ist:das grosse fliegend pferd/stil gestanden / vnd ist sein materia fast vor- zeret/ Der glantz seiner substanz hat bald in die zwey hundert mer insich gehabt/das er auch in vielen jaren nicht grösser ist erschienen noch schrecklicher gesehen worden.

B

Dennoch

Dennoch ist in den tumulten vnd Rummoren Grece zu den zeiten Ruffini vnd Arcadij ein solcher Comet gestanden/welcher seinen schwantz stracks vntersich / bis auff den horizontem gesencket vnd vntersich hat fallen lassen/ darauff den bald hernacher die schöne Stadt Constantinopel vnd das regnum gracie vom Türcken eingenommen / vnd zurstöret ist worden/vnd fürchte eigentlich / dieses Cometen scheusliche grösse/werden grosse vnd schreckliche straffen vnd vorwüstung herrlicher lande vnd stete/auch degradationes hoher personen volgen.

Ob nu dieser Cometa lange stehen könne / ist vnd stehet bey Gott/ es wollen dennoch viele also darvon sagen / des cometen substanz vnd materia / könne nicht ehe als in sibentagen verbrennen/er vormöge auch nicht wol lenger als 40. tage stehen/dis feilet aber offemals / den darnach s in corpus gros oder Klein/ der materia viel oder wenig/ darnach sie auch ad siccum disponiret / als sie auch dichte oder schwarz / darnach wird sie auch hoch oder miderich auffgerücket/ vnd wird auch frü oder speter zur teilet vnd vorzeret. Jo sie aber lenger gesehen werden / jo vns der gütige Gott mehr zur bus fordert / vnd mit der straffe (wo wir vns nicht bald besseren vnd von bösem vorhaben abstehen) lenger vnd scherffer anzuhalten drawet/der Barmhertzige Gott kan erbethen werden/drumb lasset vns from werden / vnd von Sünden abstehen/ welches so den geschicht/wird der barmhertzige Gott dis bedrawolichs von vns abwenden.

Aristoteles gibt zu erkennen / das vff einmal vnd zu gleicher zeit nicht mehr als ein Cometa stehen könne / vnd gibt desselben diese vrsach/das die fetten dünste/ so aus der erden steigen/ vnd durch die kalte lufft in die höhere vnd ferwirrige gezogen werden/die selben zibe der erste Cometa ratione similitudinis & ui ignea an sich/ setzet die zu seiner materia / machets derselben einförmich / vnd vorzerets mit dem ersten/der wegen werden nimmer/ mehr/als einer zur zeit gesehen werden.

Von was Vater mütter / vnd was vor gute geschwister er hat wollen wir jzo anhören. Es wissen sich L. L. W. zu berichten

berichten/das wir im jar 76. auch bis iar 77. etzliche schreck-  
liche vnd vnderscheidene finsternis eine im zeichen der Wage/  
die andern im Widder gehabt / vnd ist beider in ariete dominus  
nach Astrologischer Calculation Mars gewesen / darauff saget  
Mesaliala ein vornemer astronomus/er habe nie eine finsternis  
der Sonnen/oder des manten welcher dominus Mars gewe-  
sen vnd sie im feurigen zeichen geschehen/gedacht darmit  
allezeit was wunderlichs sich nach begeben vnd erzeiget ha-  
be/ derwegen ich auch in vorgangenen jars prognosticis ges-  
setzet habe wir würden zu der zeit wenn der finsternis effect  
angehen würde/ viel feuriger Himmel zeichen in lufften se-  
hen / vnd finden.

Hiraus erscheint klar/ das die defectus luminum vnd ander  
constellationes planetarum diese materiam in die luffte auffgezogen  
vnd also diesen cometen vorursachet haben / wo zu den auch  
nicht wenig gehülffen hat / dieses ganzen Sommers vnd  
vorwinters vnbestendig wetter/so den bald warm/ bald nas/  
solchen exhalationibus aptissimum gewesen.

Es sind auch eben vmb Andree fest / drey runde Cir-  
ckel von selzamen farben/ mit geschos vnd stralen vmb den  
mon stehend gesehen worden / als offter mals ignes pyramidales  
bliren vnd hefftigen donner( welche nicht vnter die igne/ son-  
dern mediorum zol gehören ) gehört worden / bis alles hat der  
feurige planeta mit seinem benachtparten leichtlich zu wege  
bringen können.

Weil ich denn in dieser herrlichen vnd schönen kunst/  
viel gewaltiger vnd geterter leute kenne / welchen ich das iu-  
ditium ganz heimgestellet wil haben/dieweille sie nicht allein  
viel schöner bücher / auch vortreffliche instrumenta daraus  
sie das fulkomener schepffen können haben / darmit ich den-  
noch auch etwas darzu aus meinen cartis brenge/wil ich in de-  
selben weitlaufftiger/nicht als mir gepüren wil/vnd mein ges-  
lehenheit vormag/kürtzlich aus Ptolomeo / Plinio / vnd Aris-  
totele etwas desselben zu warnung der geme nte auszeichnen  
vnd hir vnten an setzen.

Ptolomeus in seinem Centiloquio saget / Obseruandi sunt in un-  
uersalib: Considerationib: colores in deliquijs, cum ipsorum luminum tum  
eorum quæ iuxta fiunt & existunt, ut uirgarum arearum & similium &c.

Hiermit wil er vns vormanen vnd anzeigen/guthe acht-  
ung zu thun /auff die gestalt form vnd farbe/ der erscheinens-  
den wunder/der lufft/ denn daraus könne man viel dings er-  
faren vnd vorstendig werden.

Was nun Mars ein Dominus vber beide Eclipses vor Klar-  
re oder heffliche farben gegeben / was auch Comete color vnd  
gestalt gewesen /weis sich idermennichlich zuerinnern vnd zu  
bescheiden. Was solche domini aber wircken/darauff zeigt vns  
Ptolomeus weiter an einem andern orth also.

Mars uero ubi solus Dominium acceperit, generaliter corruptionis  
causa est, propter siccitatem, & quando euentus ad homines pertinent, ciet  
bella, seditiones, intestinas, captiuitates, excidia urbium, populi tumulos, prin-  
cipum iras, & propter illas causas subitas neces: præterea feb: tertianas, mor-  
bos acutos, uiolentos meritus iuuenum, uiolentiam, iniurias, incendia, rapinas  
& latrocinia. In aere excitat turbines uentos, calidos & pestiferos tabificos  
eosq; fulminum iaculationes, frumenta & res terra nascentes diminuit.

Hieraus ist leichtlich zuermessen was der vrsprung  
vrsach vnd herkommen dieses Cometen/ auch was Mars bei  
der Finsternis Dominus gutes vnd böses dabey schaffen/ vnd  
mit sampt dem effect des Cometen vorrichten/ vnd darbey  
bringen werde.

Nun wil volgen das man anmelden mus / wie auch  
oben kurtz angezeigt ist / dieweil der Comet im zeichen des  
Steinbocks/in vnser hemispherio erschienen/aber von seinem  
Vater dem gramseligen wunderlichen alten vnd kaltem Sa-  
turno /neben andern geboren / was jm nu der selbe neben and-  
ern anerbien wil / solchs soltet ihr itzo bald hernacher hö-  
ren.

Ptolomeus lib. 2. predictionum saget also / wenn Saturnus  
vber ein solch gesichte allein herschet / so sey er ein vrsach vie-  
les vorderbens / wegen geschwinder kälde / bringe vnd färe  
den Menschen langweilige krankheiten jammer vnd noth/  
gemeinlich aber komen die krankheiten von catharris vnd  
haupt

haupte flüssen / beweget die vier feuchte in Menschlichem  
cörper/vorursachet mannigerley Kranckheiten/bringe hunger/  
kummer/ armuth / elend/ bedrücknis/ gefar/ angest vnd schre-  
cken/ absterben der alten/ vorderb/ vorlust/ abfallen vom glau-  
ben/ bezeichnet thewörung vnd kummer/ alles des dar von sich  
der Mensch erhalten solle / drüße vnd feulnis des vultre-  
then vihes darnach eben dasselbige dem Menschen.

In der lufft schaffet er grossen frost/ hagel/ schne/ stin-  
ckende dicke nebel / vnnnd pestilenz lufft/ starcke vngewer-  
winde mit vnbeständigem wetter/ viel storm / viel fluth vnd  
Schiffbruch / vorderb vnd absterbend der Vische im süßem  
Wassern/ auch schaden der sehe/ tewörung im getreide/ wegen  
vieles kalten regens vnd hagels / In summa dieser kumpen  
hat lust dem Menschen vnnnd Viehe durch hunger/ kummer  
vnd drüße schaden zu thun/ mit gefengnis vnd tribulation/  
wird er viel hoher vnd niedriger veriren.

Der ander dominus der finsternis als Mars/ wird mit  
feuer vnd schwert vmb sich schlagen vnnnd brennen / hirmit  
vnnnd hirdurch wird der liebe Gott die vndanckbar schnöde  
Welt/ wo sie nicht buesse thut / eiffern vnd straffen/ das man  
nicher darnach fülen vnd greiffen wird.

Nach dem nu gehöret das die finsternis des 77. auch  
76. im fevorigen zeichen geschehen sindt sub domino Martis auch  
ander vielfeltige coniunctiones planetarum diesem cometen ein  
grosse vrsach gegeben / so woltet jr nu auch gerne hören was  
dieses Cometen eigentliche Wirkung sein solle/ auch wie lan-  
ge die weren solle/ in was landen/ auff was stete vnnnd flecken  
er seine giftige operation aus giessen werde.

Hirauß gebe ich euch zu wissen das aus der doctrina astro-  
nomica/ so viel wir der wissent/ nicht eigentlich vber einkomen/  
wie man durationem effectus, wie man erkunden vnd ausrech-  
nen soll die zeit seiner bedrawolichen Wirkung/ denn deren viel  
wollen sagen/ so mannich zeichen er durchlauffe / so mannich  
jar sol man seiner Wirkung zu schreiben / ezliche wollen vor  
jeden monat ein jar setzen/ ezliche setzen vor jeden tag ein jar/

Das aber dieses alles ungewis vnd falsch / zeigen die exempel  
an / man kans auch zum teil aus der vornunfft refutiren / Es  
saget auch Ptolomeus das ezliche Cometen gewis an einem  
ort stehen bleiben / dar auff doch mehr als eines jars beschwe-  
rung genolget ist / So hat man auch aus den historicis / das  
ezliche 70. vnd mer dage gestandē / Joh. Milichius saget / das  
sie 180. tage stehn können / die wolten den auch so vor jeden  
tag ein jar solte gesetzet vnd gerechnet werden / vber Mensch-  
en lebtage ire Wirkung haben / Welche aber setzen vor dem  
lauff durch ein zeichen / ein jar / solchs wer wol glaublicher wie  
man nicht desselben ander nachrichtung vnd exempel hette /  
denn man findet ezliche / welche nicht mehr als ein zeichen  
durch lauffen / vnd nicht lenger als monats frist gestanden /  
vnd sind dennoch 6. betrübter jar darauff genolget.

Von der zeit hero als ich diesen ansecklich gesehen /  
belauffet sich an diese zeit 59. tage / dieweil er aber noch steht /  
weis ich nicht eigentlich sein endschafft zu setzen / viel weniger  
rechnung darauff zulegen / Da nu vor jeden tag ein jar zu legen /  
so möchte manninger wünschē / das er viel jar zuuoren mit  
gutem todt wer abgegangen / Solte nu diesem Cometen sein  
effect vnd Wirkung nach dem zal der monat oder himlischen  
zeichen / gerechnet werden / so wolte es sich vff drey jar vor-  
lauffen / denn er zu dieser zeit drey himlische zeichen mit seinen  
lauff durchstrichen vnd erreicht hat / Achte es aber vor meine  
einfalt dahin / das die duration seiner Wirkung dem gütigen  
Gott allein bekandt sey / der in vns zum zeichen seines zorns  
vnd bedrawlicher straff dahin an die stette gestellet hat / wie  
Ioannes Damascenus bezeuget / *Cometam a deo firei & dissoluis Deo.*

Meine gedanken aber vnd vorsorge wil ich hierna-  
cher auch setzen / denn ich befinde zu vorderst bis auff das  
83. jar viel schrecklicher betrübter zeit / vnd die andern vol-  
gende jar / tügen im grunde auch nichts vnnb fürchte derwe-  
gen grossen vnd schweren betrug in allen stenden / D. Philip-  
pus mein seliger praceptor pflag zu sagen in seinen pralectionibus:  
Das

Das jar achtzig acht /  
Das ist das ich betrachte /  
Geht denn die Welt niche vnder /  
So geschicht viel selzams wunder.

Ich befinde aber das dis jtz lauffende / jar mit seinen  
folgenden jaren wol so sorglich ist als die folgenden / vnd ha-  
ben alle stende noch viel böfers weges vorsich / ehe sie darhin  
kommen werden / vnser wenich werden / den *trigonum igneum* er-  
frenlich vollenzihen / denn weil die *Eclipses* vorlauffner jar-  
ren in fewrigen zeichen geschehen / jr operation vnd Wirkung  
in dis jar in den dritten tag des Meyen vorschauen vnd auff-  
rucken / wir auch widerumb im selben zeichen ein finsternis ha-  
ben / welche jr krafft in das ander jar vorstreckt / haben auch  
im jar 79. widder ein finsternis der Sonnen im 80. eine des  
monats / im 81. zwey des monats im 82. widerumb der Sun-  
nen darzu viel selzamer anderer planeten *configurations* vnd  
*coniunctiones* / welches alles nicht vom besten ist / Es ist der  
Cometa dieses jars in *occidentali plaga* gesehen / so ist geringer zweif-  
fel das er nicht seine Wirkung mit den *defectibus luminarum* vor-  
mischen vnd wie zum teil gehört / viel schrecklichs vnd bö-  
ses / diese fünf jar nach einander ausspenden vnd vielleicht  
hernacher viel jar beharlich treiben werde.

Ob nu wol auch die *Astronomi* sagen / Wenn ein Co-  
met im occident gesehen / desselben Wirkung wird etwas  
langsamer sein / die aber im orient auffgehen vnd gesehen wer-  
den / die fangen schnelle vnd also bald ire Wirkung an / Als  
wir nun diesen gesehen im Steinbock welches ein *signum mobile*  
ist / achte ichs dafür / das sein Wirkung lange / doch bisweilen  
vnbestendich sein werde / hoffe auch zum lieben Gott er werde  
vns nach gnugsamer bues / Regen manig vnglück / wider-  
umb ein glück mit seiner macht / krafft / vnd glückreichen gna-  
den erzeugen / vnd vns vnter diesem Tyrantischem bedruck  
nicht gantzlich bleiben vnd vorzagen lassen.

Das er aber bald anfangen werde/solchs gebe ich der  
finsternis iren effect vnd des Martis naturen halben nach/  
doch stehet alles bey Gott.

Die iudicia von den iij. zeichen aus dem Leopoldo vnd  
anderen genommen / strecken sich in genere dahin / das wenn  
ein Comet im Steinbock gesehen / bedeutet er einen beharlis-  
chen kummer/beyde dem Menschen vnd vihe/ denn es ist ein  
signum mobile/deutet auch Krieg vnd beschwerung dem gemei-  
nen man / auffrohr/ zant vnd krieg/ zwischen den Königen  
vnd Fürsten in Westen wohnt / bedeut grossen infall/belas-  
tung/mord vnd brand/von feinden. Er weist auch mit fins-  
gern auff die feinde der Christenheit aus Persiē/ aus Malachi  
vnd Barbari. Die Geistlichen werden diese zeit vber ein harte  
stand vnd widerstand haben/der gemeine man mit den geist-  
lichen vorfolgung/anfechtung / vorleucknis ires stands / ge-  
fencnis / Es werden auch vil fromer leut in angst vnd her-  
zenleit / vorzweiffeln vnd vorzagen / die auch in custodij  
vorhalten/ so sie köndten / sich selber den todt anthun / Viel  
werden mörderisch offenbar vnd heimlich / one vorgehende  
schult gehenckelt vnd stranguliert werden. Man wil auch von  
inen wissen/ das inen unbekant / darüber mancher in merck-  
liche not komen sol.

Der Comet im Steinbock vorursacht feuer in dem  
lüfften/viel schne/ hagel vnd kalte regen/ kummer der weide  
vnd des futters/ absterben vnd vorlust der wilden thier / vor-  
ursachet auch tewe zeit / vortirbet vnd vorgiffet mit nebel  
schwalm vnd dampff die fruchte/darnon beide menschen vil  
Vihe leben saltē / werden also die bieste mit drüessen vnd  
geschwellen vorhungern vnd vorummern/ dise giffte wird  
auch von dem vihe an die Menschen gelangen / Gott gebe  
vns ware rechte bus / vnd erzeige vns seine Göttliche gnade  
Amen.

Dis günstige Herren sint die Kleinrotter / welch vns  
der Comet im Steinbock gesehen mitteilēt/dieses allen haben  
sich zum teil die Westerschen zum teil die mitternecherischen  
zubez

zugefahren/ Also nu auch dieser Comet das zeichen des Was-  
sermans erreicht/ vnd durchstreuffet hat/ welcher ein *signum*  
*fixum*/ so zeigt er in diesem zeichen eines grossen Herren vnd  
Könings absterbent/ der nach Osten wonet/ vnd wird ein  
frembder gast nach land vnd leuten stehn/ dieselben aber one  
blutuergiessung zu erlangen ist mislich/ es werden auch erzli-  
che von den Christen mit den vnchristen vorbündnis/ sich  
selber zu einen mercklich blutbat anrichten/ Gott wende ire  
gemüter auff besser wege/ aus lieffland vnd Polen blühet  
nicht viel gutes/ denn sie hören mit in die finsternis im Wid-  
der vorgangenes jars geschehen/ gegen nidderganck der Sun-  
nen/ vnd nach den mitternechtischen landen wircket dieser  
Comet merckliche vorreterey/ Tyranny/ blutuorgiessent/  
schrecklich streuffen/ plündern/ rauben/ brennen/ morden/  
solchs durch einen durchzug vnd keinen rechten krieg/ drum  
haltet euch zusammen jr Fürsten Christliches bluts/ gönnet  
nicht das der feind ewer gelegenheit vnd lande lerne/ er  
wird sonsten offte anklopffen/ Sehe dich für du Christlicher  
Zauptman/ schlaffe nicht/ die zeit wils dis mal nicht anders  
erleiden/ denn des oben gesetzten wird nicht wenig sein/ vmb  
den Herbst/ beut dem feind den kopff/ so ist des feindes glück  
zurück/ also/ den kanstu jm mit vorsichtigkeit mercklichen  
abbruch thun/ Diese oben erzelete vnglück werden erzliche jar  
nach einander anhalten/ drum vorsorget ewer Festung/ ruffet  
Gott mit warheit an/ in Kirchen vnd schulen/ vorsehet vnd  
vorwaret die pass vnd munitio/ da solchs von euch nicht ge-  
schicht wird der reiche mit dem armen/ der vnschuldige mit  
de schuldigen das blut bat vorfüllē helffen/ dieweile er auch  
in diesem zeichen infüret/ viel dunckeler trüber/ dicke stinckes  
der lufft vnd nebel/ darvon vihe vnd Menschen vorgiffet  
werden/ so wird des viel vmbkommen/ die vische im stehen-  
den deichen vmbkomen/ die Vogel des Himels/ werden diese  
Gifftige zeit ende vnd örther/ da dieses Cometen *uenanata qualitas*  
nicht ist/ sich zubeschützen hinfliehen/ den Menschen wird  
angst vnd weh werden/ vmb sich vnd ire Kinder zu erhalten/  
denn des getreides vnd fruchte wird wenig wachsen/ vnd  
C das

Das wenige so noch wachsen wird / das wird die vngesunde  
*qualitas aeris vordann / vorgiffen vnd verderben.*

Die wanderung des Cometen zu dem zeichen der visch/  
bedeutet absterben vnd schrecklichen morder / dem gemein  
man / auch grossen abfall von glauben / aus forcht eines vn-  
christlichen feindes / drawet auch noch mehr wunder gesichte  
vnd geschichte in lufften / darumb wir noch mehr andere war-  
nungs zeichen / viel blirem vnd donner zu erwarten haben.

Der Teuffliche eiffer des feindes sticket an vnd vor-  
brennet vnd vordirbet in den grund / viel herrlicher stete vnd  
dörffer / die Geistlichen befinden einen vnglückseligen standt /  
einer wird sich setzen gegen den andern / derwegen einer den  
anderen in merckliche last setzen / drum saget L. Austriacus  
*Multa erunt angustiae hominum, & mortes in plurib: Climatib: & hoc dura-  
rabit annis plurimis Cometa existente in plaga occidentali.*

Dis sind also die plagen vnd ruthen / darmit vns der  
gütige Gott auff dis mal (wo wir vns nicht zu jm keren) dra-  
wet / dis kan man also ans grund der astronomy bezeugen vnd  
darthun.

Dem lieben trewen barmherzigen Gott / sey lob ehr  
vnd danck / der vns noch so gnedig erscheinet / vnd zeichen der  
warnung / vor die augen stellet / ob sich etwo die böse schnöde  
Welt bessern / von Sünden / lastern vnd schanden abstehen /  
vnd auffhören wolte / welches so den geschehe / zweiffel ich  
nicht / der diese kergzen angezündet hette / künde vnd würde  
ire gifftige krafft vnd macht brechen / vnd zum besten ende  
richten / würden wir es aber nicht erkennen / vñ vns gar nichts  
bessern / so ist die feurige vnd eifferige rutge albereit gebunden /  
des straffers zorn brennet / so schlegt er allbereit mit gewalt  
drein / drum sehen sich für die stete vnd lande so vnter dieser  
dreyen himlischen zeichen nach art Astronomischer rechnung  
ligen vnd wohnen / wiewol es sehr vbelsteht auff einen jeden  
mit fingern zu weisen / so heisset es doch also.

*Quid uetat e caelo secreta referre futura,*

*Si modo sint causis Consona quaeq; suis*

Vnter

Vnter dem Steinbock / wird gesetzet / Albania / Bulgaria / Ungern / Littaw / Sachsen / Hessen / Düringen / Brandenburg / Steyermark / Göllich / Kleue / Bergen / Mescheln / Augspurg / Costnitz / vnd Saentz.

Vnter dem Wasserman / Walachi / Tartari / Rothe reussen / Dennemark / ein teil Schweden / Westphalen / Hamburg / Bremen / Salzburg / Beyern vnd Ingolstadt.

Vnter die Vische / gehöret Normandi / Regenspurg / Wormbs vnd Alexandria.

Wegen der finsternissen im Widder geschehen / so auch in diesen dantz gehöre ist / Burgundia / Frankreich / Britannien / Westerich / Kerndten / Wien / Schwaben / Schlesi / Polen / Neapel / Brunschwig / Cracaw / Dantzig.

Ob nu wol diese namhafftig gemacht sein / nach gemeiner art vnn rechnung / so sein irer doch vngleich merh die mit in irem Circo ligen / welchen allen sampt prognosticiret wird / *aliquid mali propter uicinum malum.*


Weil auch viel trewhertziger gelarter leut mannigerley exempla was die Cometen bedeuten / auch was jemals darz aufferfolget sey / von mir zusamen gebracht vnd in den druck auß gehen lassen / so muß ich in diesem meinen tractat schliffen vnd abkürzen / vnd den Christlichen leser an die Theologicas meditationes vorweisen / denn so ich dieses noch hie ansetzen wolte / würde sich one des zum gantzen buech vorstrecken / Bitte aber *E. E. W.* wolle diese meine *lucubrationes* sich gefallen lassen / vnd von mir dieses anders nicht als trewhertziger meinung geschehen deuten / dieses auch in gleicher wolmeinung auff vnd annemen.


Der ewige barmhertzige Gott vorleihe vns diesem vnn glück zu wider stehen krafft / macht vnd Göttliche gnade vnd Segen. Amen / Amen / Amen / 22. Decemb: zu Hannover anno 77.


*E. E. W.*


dienstwilliger

Hector Mithobius D.









B.I.G.

Farbkarte #13

Blue Cyan Green Yellow Red Magenta White 3/Color Black

6

# Einfalt-

so erschienenen Co-  
st worden im Jar  
tembris.

nes lieben Vaterlan-  
er Erbaren Steten  
er / Hameln  
eim.

*M. h. 192*

Hectorem Mithobium  
orem.

Cometae est  
ira docent.  
ille Cometa  
multa feret.  
sequuntur.  
secunda manent.

durch Wolfgang  
578.

